

Carta xi catsingatju San Pablo xi cafahatsja xuta ladu rë Jesucristu ngajan nandya Colosas

1 Ngahan Pablo ne, apóstol tsëhë Jesucristu ngahan ta, tsëhë xi cuatjin camameje rë Nina. Ngahan cojo Timoteo xingueen ne, ²ningátjin nuju carta vihi ngayun xuta nandya Colosas, ngayujun ni xuta ladu rë Nina xi jercu ndaja titsangunndujun cojo ndiya rë me hacuaha tjin tangun cjuatacun nuju cojo Jesucristu. Nina Nahmi naja ne, catisua nuju me cjuandaja cjuajeya.

**Sua Pablo nacuechji rë Nina
ngatsë rë xuta nandya Colosas**

³Jercu tihín nacuechji rë Nina Nahmi rë Nai naja Jesucristu yasen yasen ni, hya xi nihñi oración ngatsë nuju. ⁴Tihín nacuechji rë Nina ta camachaya niji hacutjin xi ngayun ne, mangutacún cojo Jesucristu hacuaha nihmutacún yëjë ni xuta ladu rë Nina. ⁵Cuatjin tinihñu ta, jercu vetuhun tacún cjuandaja xi Nina tacunxin rë me ngajan ngahnga xi cuma nuju ngayujun ni. Cavetsuhun cavetuhun tacún cuatjin, hatsëë hya xi canuhyun cjuandajiyihi xi cjuaquixi, xi chja tsëhë Jesucristu.

⁶Cjuandajiyihi jan ne, casacu camachaya nuju sacuatjin sa rë yahnga xuta tsëhë jercu cjin sa cahndé. Hane xi macjain rë xuta cjuandajiyihi jan ne, jercu tisahmi me cjuandaja, hacuaha jercu cjin sa xuta tijimacjain rë me. Cuanitjin tivatju ngajñi nuju ngayujun ni, hisca hya xi camachaya nuju cjuajan hacuaha ndaja cavijnercun xi Nina ne, jercu sahmi me cjuandaja. ⁷Cuatjin cachja cojo nuju Epafras, me xi jercu vinga niji hacuaha tangun fahacuenda me cojo niji xa xi vitexa Jesucristu. Me vëhë ne, jercu ndaja cjuinduju me tifahacuenda me tsëhë xa jan cojo sa xi tsujun ndaja. ⁸Hacuaha casua me camachaya niji xi ngayujun ni ne, tjin nuju cjuahmutacun cojo yëjë ni xuta ladu rë Nina, cojo cjuahmutacun xi sua nuju Hasen rë Nina.

⁹Ngatsë rë xi cuatjin camachaya niji tsëhë cjuaja xi chja tsujun ngayujun ni ne, vëhë xi tinihñi oración tsujun ngayujun ni yasen yasen ni hisca hya xi camachaya niji. Tichjahyin rë Nina xi

cuijnercun yějē hacutjin xi meje rē Nina xi nihñu. Tichjahyin rē me xi ndaja tuxaha cjuatacun nuju hacuaha cuijnercun cojo cjuatacun xi sua nuju Hasen rē Nina. ¹⁰Cuatjin tichjahyin rē me, cojo sa xi ngayujun ni ne, cuangunndujun cojo ngasunhndē nuju sacuatjin meje rē xi sahmi xuta ladu rē Nai naja, cojo sa xi chuya rē me tsēhē yějē ni xi nihñu. Cuatjin tichjahyin rē me, cojo sa xi ngayujun ni ne, nihñu yějē ni xcusun cjuandaja, hacuaha ndaja sa chun Nina ngu nixtin ngu nixtin. ¹¹Nina catisua nuju me ndaja cjin ngahñu, tucu ngahñu xi tjin rē me, cojo sa xi yějē ni nixtin scaa nuju cojo yějē ni xcusun xi vatjun má hacuaha nijyun tacún cojo xuta, táha tijimasua nuju. ¹²Cuatjin tichjahyin rē Nina, cojo sa xi ngayujun ni ne, tuhun nacuechji rē Nahmi naja ngatsē rē xi me vėhē ne, cavėhėchjine nuju me cojo sa xi cojo ngayun satē nuju cjuandaja xi sua me xuta ladu rē me ngajan ngahnga. ¹³Nina Nahmi naja ne, cavaxėtje naja me tsēhē xitsehen xi matitjun tsēhē yějē ni cjuatsehen, hane cavejña naja me tsja Quihndi rē me xi jercu hmucacun me. ¹⁴Cojo xcusun xi casahmi Quihndi rē me jan ne, Nina ne, cavechjitje me yějē ni jyé xi quitjen xuta, hane catsinchataha me ngayaan.

**Sahmi Nina xi cuya cumandaja
ngayaan cojo rē me**

¹⁵Quihndi rē me jan ne, tsingacun naja hacutjin xcusun rē Nina cojo Hasen rē me, handasa maji matsejen Nina. Quihndi rē me

jan ne, hatuxa matitjun me tsēhē yějē ni xi casahmi Nina ta, ¹⁶tsēhē xi cojo me ne, Nina ne, casahmi me yějē ni xi tjin ngasunhndē xi tsejen, cojo yějē ni xi tjin ngahnga xi matsijin, sacuaha yějē ni xcusun hasen xi matitjun sa hasen ndaja sa hasen tsehen. Cojo me vėhē ne, casahmi Nina yějē ni, cojo sa xi yějē ni xi cuacun jan ne, sahmi jyé sahmi hnga rē me. ¹⁷Quihndi rē me jan ne, hatuxa matitjun me tsēhē yějē ni xi casahmi Nina ta, tsēhē xi me vėhē xi tjun sa tacun me xi cuma rē yějē ni hacuaha ngatsē rē me vėhē ne, siuchihin yějē ni. ¹⁸Me vėhē ne, vitexa me xuta ladu rē Nina sacuatjin rē rcuun xi vitexa rē yojo naja. Hacuaha sua me cjuahñu xatsē xuta ladu rē Nina ta, tsēhē xi me vėhē tjun tjun me cavuya me cjuahñu tsēhē ngajni rē yějē nima, cojo sa xi cumatitjun camahani me. ¹⁹Quihndi rē Nina jan ne, tsingacun naja hacutjin xcusun rē Nina cojo Hasen rē me ta, tsēhē xi cachuya rē Nina xi cuisehentē me cuejñacahndē suvá me cahntsua xahasen rē Quihndi rē me. ²⁰Nina Nahmi naja ne, cavejña naja me tsja Quihndi rē me, tsēhē xi cavejñangucacun me xi cojo Quihndi rē me ne, tsicuya me ladu rē me ngayějē ngarca ni, sa ngahnga sa ngasunhndē, cojo sa xi cumajyē cumahnga Quihndi rē me jan. Hane ngatsē rē jni rē Quihndi rē me xi cavanga xcun cru ne, hindē tsajin mé cjuachan.

²¹Ngayujun ni ne, handasa hatsėē ne, jemu cjin nechun tsēhē Nina hacuaha condra nuju me ngatsē rē xi jemu tsehen cjuatacun nuju

hacuaha jemu tsehen xcusun xi canihñu, ²²peru quihndë ne, casahmi Nina xi cavuya nga camandaja yun cojo rë me. Cuatjin casahmi me cojo cjuaveya tsëhë yojo rë Quihndi rë me, cojo sa xi ngayujun ni ne, tsëhë me yun hacuaha tsajin camahani jyë nuju, hya xi squindaya nuju me xi cuangun xcun me. ²³Cuatjin cuma sa xi cjuenduju xi siu cahndé cjuatacun nuju xi macjain nuju cjuandajyihî xi chja tsëhë Cristu, hacuaha cjuenduju xi vetuhun tacún cjuandajyihî xi canuhyun jan. Hane cjuandajyihî jan ne, casacu camachaya rë xuta tsëhë jercu cjin cahndé. Hane ngahan Pablo ne, casatëxa ná xi suá machaya rë xuta cjuandajyihî jan.

**Casuaxa Nina Pablo xi cuichjatë
me cjuatahahma ndajyihî
xi chja tsëhë Jesucristu**

²⁴Quihndë ne, ma sua ná xi tivátju cjuañihî cojo sa xi tsujun ndaja. Tisahmechehen tsëhë yëjë ni cjuañihî xi cachja Cristu xi cuátju cuma cojo yojo naha, cojo sa xi tsëhë xuta ladu rë me ndaja, hane ngayejen ni xi ladu rë me ne, sacuaha yojo rë me ngayaan. ²⁵Ngahan ne, camá ngahan ngu xuta xi visécoo rë xuta ladu rë Cristu, tsëhë xi Nina casuaxa ná me xi cuisécoo nuju ngayun xutaxín, cojo sa xi suá cumachaya nuju tsëhë yëjë ni cjuandajyihî xi cachja me. ²⁶Cjuandajyihî jan xi cachja me ne, hacui cjuatahahma. Cjua vëhë ne, cavetjo Nina tsëhë yëjë ni xuta xi caviyuju me yëjë ni nixtin xi cavatju, peru quihndë ne, casua

me camachaya rë yëjë ni xuta ladu rë me. ²⁷Nina ne, cavejñangucacun me xi sua me cumachaya rë xuta xi cuacun jan xi cjuatahahma vihi ne, chja xi jercu tsinchacuntihin Nina xutaxín jan. Cuma cuinújan ne, Cristu ne, cuejñacahndë me cahntsua xahasen nuju ngayun xutaxín. Hane cuetuhun tacún xi sehe cuaxëndaja me yun. ²⁸Ngayin ne, tihín cumachaya rë xuta tsëhë cjua xi chja tsëhë Cristu. Yëjë ni xcusun xuta ne, viyijin me cuidadu hacuaha vicuyin rë me cojo yëjë ni cjuahasen xi tjin nijî. Cuatjin nihñî, cojo sa xi yëjë ni xuta xi cuacun jan ne, tyjahî camahani me xi tjin tangun cjuatacun rë me cojo Cristu, hya xi ningacuin me xcun Nina. ²⁹Ngatsë rë vëhë ne, ngahan ne, hacuaha hñu tisahme xa, hacuaha tisahme ngahñu cojo yëjë ni ngahñu xi tisua ná Cristu.

2 Hacuaha meje ná xi cumachaya nuju xi jercu tisahme ngahñu ngatsë nuju cojo ngatsë rë me xi siu ngajan nandya Laodicea cojo tsëhë yëjë sa me xi cjëë scuëë ná. ²Cuatjin sahme, cojo sa xi ngayujun ni ne, sacú hñu rë xahasen nuju ngatsë rë xi tjin tangun cjuatacun nuju cojo xingun cojo yëjë ni cjuahmutacun. Hacuaha cuatjin sahme, cojo sa xi sacúndaja cumachaya nuju hacuaha jercu ndaja camahani cuijnercun cjuatahahma ndajyihî rë Nina, xi chja tsëhë Cristu. ³Cristu ne, suvá ni me vëhë cuma sua naja me cjuatacun xi jercu ndaja cuijnercun yëjë ni cjuatahahma ndajyihî jan. ⁴Cuitjin tichjá cojo nuju, cojo sa xi tsajin yo cuma cuindacha nuju

cojo cjuua xi matanguaain cojo cjuua xi cjuaquixi, handasa jercu ndaja nuhya rë, xi má nuju. ⁵Handasa tsajin tejñataha cojo nuju ne, peru jercu vityangë cacún tsujun ngayujun ni. Hacuaha ma sua ná, tsëhë xi hvë xi ngayujun ni ne, tjin tangun cjuatacun nuju cojo xingun hacuaha jercu ndaja mangu tacún cojo Cristu.

Vitexa Pablo xi nihña sacuatjin meje rë xi sahmi xuta ladu rë Jesucristu

⁶Vëhë xi, sacuatjin xi camacjain nuju cjuandajyihî xi chja tsëhë Jesucristu, me xi Nai naja ne, cuatjin tángunndujun cojo ngasunhdë nuju xi tjin tangun cjuatacun nuju cojo rë me. ⁷Catjinduju xi ndaja macjain nuju cjuua jan, hacuaha ndaja sa catamacjain nuju ngu nixtin ngu nixtin. Catjinduju xi siu cahndë cjuatacun nuju cojo cjuachacun xi macjain naja, sacuatjin cavicuya nuju Epafra. Hacuaha catjinduju xi jercu tuhun nacuechji rë Nina Nahmi naja.

Tsavi cojo ngu cjuachacun xatsë xi vicuya xuta ndacha

⁸Nechun cuidado, sá tu yo sahmi xi cuisuhun ladu rë ngatsë rë xi cuindacha nuju cojo ngu cjuachacun xi venguiin chji rë, tsëhë xi cjuachacun jan ne, nduva tsëhë xcusun rë xuta ngasunhdë ni, hacuaha tsëhë suvá ngasunhdë vihi yëjë ni cjuua rë jan, hacuiin tsëhë Cristu. ⁹Nihñu cuidado ta, yëjë xcusun rë Nina ne, tjin Cristu, ta Nina ne, vejñacahndë me yojo rë Cristu, ¹⁰hacuaha ngayun ne, tsajin

mé xi chaja rë hasen nuju, tsëhë xi tjin tangun cjuatacun nuju cojo Cristu, me xi matitjun camahani tsëhë yëjë ni hasen xi hacuaha vitexa, sa hasen ndaja sa hasen tsehen. ¹¹Ngatsë rë xi tjin tangun cjuatacun nuju ngayujun ni cojo rë me ne, ha sacuaha xi me vëhë cavatë me chuxin nuju. Hane vëhë ne, hacuiin vijne xi cati jain chuxin nuju sacuaha sahmi xuta cojo quihndi langa ta xi vijne jan ne, yëjë ni cjuatsehen xi tjin naja cojo yojo naja ne, cavaxëxin camahani Cristu. ¹²Hya xi caxtenda ngayun ne, ha sacuaha xi caveyun ne, hacuaha Nina caveyaniji nuju me tangun cojo Cristu, sehe catsicuya nuju me cjuahñu nga cojo rë me, ngatsë rë xi camangu tacún cojo ngahñu rë Nina, me xi catsicuya rë Cristu cjuahñu tsëhë ngajñi rë yëjë nima. ¹³Hatsëë ne, ha sacuaha xi nima má ngayun ngatsë rë jyë nuju hacuaha ngatsë rë yëjë cjuatsehen xi tjin nuju cojo yojo nuju. Peru quihndë ne, ngayujun ni xi catsicuya nga nuju Nina cjuahñu tangun cojo Cristu, Nina ne, catsinchataha naja me cojo yëjë jyë naja. ¹⁴Cuma cuinújan ne, sacuaha xi cavujnu Nina cjuua xi hinchá xcun xujun xi tsicaniji jyë naja. Sacuaha xi catsicjëya me xujun jan, hya xi cahme Cristu xcun cru. ¹⁵Nina ne, cafaxin me xa xi siutahá yëjë ni hasen ndaja cojo hasen tsehen xi cavitexa, hane catsingacuntë me xi cuatjin casahmi me. Caca rë me cavinchangahma me hasen xi cuacun jan, cojo yëjë ni xi casahmi Cristu.

¹⁶Xicachjasuun tsëhë xuta xi tsicanijiyë me ngayun ngatsë

rë xcusun xi chinu o xi hyun, o ngatsë rë suhi xi nihñu, há chuva nu, há chuva sá, o há chuva totje. ¹⁷Xicachasuun ta yějë ni xcusun xi cuacun jan ne, sacuaha tjahnguen ni rë yějë ni cjuandaja xi casua nuju Cristu. ¹⁸Xicachasuun tséhë xuta xi cuatjin tsicanijiyë nuju me xi chja me xi hatuxa meje rë xi ninguijnu yojo nuju hacuaha chjuhuncun ángel. Xuta xi cuacun jan ne, chja me xi chja xu nijñá cojo rë me hacuaha sahmi yehe me yojo rë me suvá me ngatsë rë cjuatacun tsehen xi vitexa rë me. ¹⁹Cuatjin sahmi me ta, vicuyaain me cjuachacun cjuaquixi tséhë Cristu, me xi sahmi xi cumatangun cjuatacun rë yějë ni xuta ladu rë Nina cojo xicjin hacuaha sahmi xi cuijin xcun xi cjuenduju me cojo ndiya rë Nina sacuatjin xi meje rë Nina.

²⁰⁻²¹Ngayujun ni ne, ngatsë rë xi tjin tangun cjuatacun nuju cojo Cristu, me xi cahme ne, vëhë xi camandaya ngayun tséhë xcusun rë xuta ngasunhndë, sacuaha mandaya ngu xuta tséhë yějë ni cjuandya rë me hya xi hme me. Vëhë xi mijí rë xi cuanguntjengun xcusun rë xuta xi chja xi cumaji chjahan vihi, cumaji xinë vëhë, cumaji nicojon xingu vë, sacuaha xi tuxa sahmi ngujyë xi cuinuhyun jan. ²²Mijí rë xi cuanguntjengun xcusun xi cuacun jan ta, tséhë xi xichinë cojo xi hyun ne, hatuxa fë hya xi nicojo rë. Hacuaha xcusun xi cuacun jan ne, nduva tséhë cjua xi vitexa xuta ngasunhndë ni, nduva tséhë cjua xi vicuya xuta ngasunhndë ni. ²³Hacuaha xcusun xi cuacun jan ne, sahmi xi xuta

ne, sahmi me yějë ni xi meje rë cjuatacun tsehen xi vitexa rë me, handasa tsejen sacuaha xcusun ndaja, ngatsë rë xi vitexa naja xi chjahanrcun nina sacuatjin meje rë xuta ngasunhndë ni hacuaha xi ninguijne yojo naja hacuaha xi chjahanñehe cojo yojo naja. Peru xcusun xi cuacun jan ne, vitexaain camahani xi nihña cjuandaja.

Catamameje naja yějë ni xi tséhë ngahnga

3 Ngayujun ni ne, casua nuju Nina cjuahñu xatsë, ha sacuaha xi catsicuya nuju me cjuahñu tangun cojo Cristu. Vëhë xi yějë ni hora ne, catamameje nuju yějë ni xi tséhë ngahnga, hiscan tacun Cristu, me xi Nina casahmi jyë casahmi hnga rë xi cuitexa me ngayëjë ni. ²Catamameje nuju yějë ni xi tséhë ngahnga, hacuiin cjuatsehen xi tséhë ngasunhndë ta, ³tséhë xi ngayun ne, ha caviyujunxun xcusun xi canihñu hatsëë, sacuatjin rë nima xi ha quihndë tsajin mé cuma sahmi sacuaha hya xi tacun sa xcun cjuahñu. Hacuaha quihndë ne, tjin nuju cjuahñu xatsë tangun cojo Cristu, me xi tacun xcun Nina. Hane xcusun vëhë ne, hatuxa matsijin. ⁴Hya xi Nina tsingacuntë me Cristu, me xi sua nuju cjuahñu xatsë ne, hya tsingacuntë nuju me hacuaha sahmi jyë sahmi hnga nuju me tangun cojo rë Cristu jan.

Xcusun changá cojo xcusun xatsë

⁵Vëhë xi xicanihñuu cjuatsehen, sacuatjin rë nima xi maji sahmi cjuatsehen. Xicanihñuu cjuatsehen

sacuaha cjuatsehen xi sahmi xuta cojo ngu xi hacuiin chjuun rë me, hacuiin xihin rë me, o sa xi ngajñi ni xihin me, o ngajñi ni chjuun me. Hisca ndajin tjin xi meje nihñu xcusun xi cuacun vë, cojo yëjë sa xcusun cjuatsehen. Mijí rë xi jercu nihmu tacún cjuanchina ta, sa xi cuatjin nihñu ne, hitsë sa nihmu tacún cjuanchina jan xi cuma rë Nina. ⁶Nina ne, sahmi me castigu yëjë ni xuta xi vihndiin tsëhë me, xi cuatjin sahmi. ⁷Hacuaha ngayujun ni ne, cuatjin canihñu hatsëë, hya xi tivinuhuun tsëhë Nina. ⁸Peru quihndë ne, mijí rë xi nihñu yëjë ni xcusun xi cuichjá cojo nuju vihi: hacuiin cumacjan nuju, hacuiin nihñu cjuatsehen, hacuiin choho cuinújun tsëhë xingun, ⁹hacuiin cuinújun cjuandacha cojo xingun. Xicanihñuu cuatjin ta, tsëhë xi ha caviyujunxun cjuatacun changá cojo yëjë ni xcusun xi canihñu xi cavitexa nuju cjuatacun jan, ¹⁰hane ha cavisehen nuju cjuatacun xatsë xi Nina tisahmi me xi cuijin xcun xi cuma sacuaha cjuatacun rë suvá me xi catsindaja cjuatacun jan, cojo sa xi ngayujun ni ne, cumachaya ndaja sa nuju nguñaja cjuaquixi yo me. ¹¹Ngajan xi cuendaain rë źhá xutaxín o há xuta tjë rë Israel má ngayaan?, źhá cati chuxin naja o há catiin rë?, źhá xuta ngu nangui ngayaan?, źhá tichjá cjuatacun naja?, źhá xuta caxteña ngayaan, o há xuta ndaya tjin ngayaan? ta Cristu ni ne, me vëhë xi jercu tu vengui chjí camahani rë me.

¹²Ngayujun ni ne, tsëhë xi cavaxijin nuju Nina, hacuaha caviyujuxin nuju me, hacuaha

hmu cacun nuju me ne, vëhë xi meje rë xi tjin nuju cjuayumatacun cojo xingun, meje rë xi tjin nuju cjuandaja cojo xingun, meje rë xi tjin nuju cjuajeya cojo xingun, meje rë xi yehe tacún cojo xingun. ¹³Hacuaha meje rë xi scaa nuju cojo xingun hacuaha ninchatuhun xingun, sa xi tjin mé tsëhë xi cuinchunjun xingun. Sacuatjin rë Nai naja xi catsinchataha nuju me ne, cuanitjin ni nuju ngayujun ni cojo xingun. ¹⁴Peru xi jercu vengui chjí sa rë xi cuma rë yëjë ni cjuaxi cachjá cojo nuju jan ne, meje rë xi tjin nuju cjuahmutacun cojo xingun ta, xi cuatjin nihñu ne, hatuxa jercu ndaja cuma tangun cjuatacun nuju cojo xingun xingu xingu ngayun.

¹⁵Cjuajeya xi casua nuju Cristu ne, catitexa rë cjuatacun nuju ta, tsëhë xi Nina ne, cavaxijin nuju me cojo sa xi cuinechun cojo cjuajeya ngajñi nuju cojo xingun. Hane meje rë xi yasen yasen ni ne, tuhun nacuechji rë Nina. ¹⁶Cjuandajyihni chja tsëhë Cristu ne, catiyujucahndë cahntsua xahasen nuju. Ticuyun xingun hacuaha tiyujun xingun cuidadu xingu xingu ngayun cojo yëjë cjuahasen xi sua nuju Nina. Sún nguñaja tacún tsëhë Nina, sacuaha salmo cojo himno cojo yëjë sa xcusun xi sen xi tsëhë Nina, sacuaha ngu nacuechji rë me xi tuhun.

¹⁷Tu mé ni xi cuinújun o xi nihñu ne, catama sacuatjin meje rë xi sahmi xuta xi tjin tangun cjuatacun rë me cojo Nai naja Jesús. Hacuaha tuhun nacuechji rë Nina Nahmi naja, xi nihñu oración cojo Jesús.

Chja Pablo hacutjin meje rë xi nihña cojo xingueen cahntsua ndya naja

¹⁸Ngayujun ni yachjin ne, tinuhyun tsëhë xihin nuju ta, tsëhë xi cuatjin ndatjin xi cuma ta, tjin tangun cjuatacun nuju cojo Nai naja. ¹⁹Ngayujun ni xihin ne, hacuaha meje rë xi nihmu tacún chjuun nuju, hacuiin choho xcusun nuju cojo rë me.

²⁰Ngayujun ni xi siucuaha xutacha nuju ne, tinuhyun tsëhë me tsëhë yëjë ni xi cuichja me cojo nuju ta, hya xi cuatjin nihñu ngayujun ni xi tjin tangun cjuatacun nuju cojo Nai naja Jesús ne, jercu chuya rë Nina. ²¹Ngayujun ni xi má yun nahmi ne, xicaningatjuntuun xi cuinújuntuhun rë quihndi nuju, ta sá tu sahmi chúvacacun.

²²Ngayujun ni xi má yun mosu hndixahan ne, tinuhyun tsëhë xuta xi má me nai nuju tsëhë yëjë ni xi cuichja me cojo nuju, hacuiin suvá hya xi tivutsejen me ngayun, sacuatjin sahmi yahnga xuta xi meje cuaxëndaja suvá me yojo rë me xcun xuta, ta tinuhyun tsëhë me cojo ngu xahasen tyjahi ngatsë rë xi chjuhuncun Nai naja. ²³Tu mé ni xcusun xi nihñu ne, nihñu nguñaja tacún, sacuaha xi tinihñu tsëhë Nai naja, hacuiin tsëhë xuta ni. ²⁴Cuatjin nihñu, tsëhë xi ha hyun ta Cristu Nai naja ne, me vëhë cuechji nuju me ta hacui me xi tivisecun rë. ²⁵Peru sa xi tjin ngajñi nuju xi hatuxa choho tisahmi ne, Nina sahmi rë me castigu tucu xcusun tsehen xi casahmi me, hacuaha Nina ne, hatuxa quixi jain me cojo cjuatacun rë me xi tsichuva

me yëjë ni xuta cojo cjuatacun rë me.

4 Ngayujun ni xi má yun nai tsëhë mosu hndixahan ne, ndaja nihñu cojo mosu hndixahan xi siu ntsun, sacuatjin mameje rë ta, tsëhë xi ha hyun xi hacuaha cojo ngayun ne, tjin nai nuju xi tacun ngajan ngahnga.

Vitexa Pablo xi nihña oración hacuaha cuisiajme cjuandaja

²Ngayujun ni ne, nihñu oración yasen yasen ni. Mijí rë xi cuma tsëhë tacún. Tuhun nacuechji rë Nina.

³Hacuaha nihñu oración ngatsë niji. Chjahyun rë Nina xi tuxaha ndiya xi cuisiajmi cojo xuta, cojo sa xi cuma tihín cumachaya rë me tsëhë cjuatahahma ndajyihí xi chja tsëhë Cristu. Hane ngatsë rë cjuandajyihí jan ne, tejñaya ndavaya. ⁴Nihñu oración ngatsë naha, cojo sa xi ngahan ne, cuichjâtë cjuatahahma jan, sacuatjin meje rë xi cuichjá.

⁵Hacuaha yëjë ni xuta xi hacuiin ladu rë Nai naja me ne, meje rë xi ndaja nihñu cojo rë me cojo yëjë ni cjuahasen xi tjin nuju, yëjë ni hora xi cuma. ⁶Hacuaha yëjë ni cjuavisiajmi nuju ne, meje rë xi cojo cjuandaja cuinújun yëjë ni hora. Xi cuatjin nihñu ne, sacú cumachaya nuju hacutjin chjayunngun cjuat sëhë xingu xingu xuta xi cuacun jan.

Tsinguijnetaha Pablo cjuat rë me

⁷Yëjë ni xi tivátju tijima ne, Tíquico ne, sua me cumachaya nuju. Me vëhë ne, ngu xuta ladu rë Jesús xi jercu vinga ná, hacuaha jercu ndaja cjuinduju me tivisecoo

me ngahan xi tangun fahacuenda me cojo ná xa xi vitexa Cristu.

⁸Titsingátju nuju me, cojo sa xi ngayujun ni ne, cumachaya nuju tsijin hacuaha cojo sa xi sua nuju me cjuajyëtacun. ⁹Hane cojo me vëhë ne, titsingátju nuju cha Onésimo, cha nangui nuju. Cha vëhë ne, cha ladu rë Nina xi jercu ndaja cjuinduju cha cojo ndiya rë me, hacuaha jercu vinga ná cha. Catsijo me xi cuacun vë ne, sua me cumachaya nuju tsëhë yëjë ni xi cavatju nguehe camá.

¹⁰Aristarco ne, me xi jiyatangun cojo ná nguehe ndavaya ne, tsingátju me nina nuju. Hacuanitjin ni Marcos, xicjin Bernabé. Ha cachjá cojo nuju tsëhë Marcos jan. Vëhë xi sa xi cjuehe me nangui nuju ne, chjuhunntsun me cojo cjuandaja. ¹¹Jesús, me xi hacuaha hmí rë Justo ne, hacuaha tsingátju me nina nuju. Ngajñi rë yëjë ni xuta tjë rë Israel ne, jyan tu tu ni me vëhë xi tisahmitangun cojo ná xa, cojo sa xi xuta ne, tsingatihin me xi Nina cuitexa rë me. Jyan me xi cuacun jan ne, casua ná me cjuajyëtacun. ¹²Hacuaha Epafras, me xi tangun nangui nuju cojo hacuaha fahacuenda tsëhë xa xi vitexa Cristu ne, tsingátju me nina nuju. Me vëhë ne, jercu sahmi me

oración ngatsë nuju yasen yasen ni, cojo sa xi ngayujun ni ne, cuma tyjahi camahani ngayun xcun Nina, hacuaha cojo sa xi ndaja cuijnercun yëjë ni hacutjin xi meje rë Nina. ¹³Ngahan ne, cuichjá cojo nuju ta Epafras jan ne, jercu vityanguicacun me tsujun cojo xuta Laodicea cojo xuta Hierápolis. ¹⁴Hacuaha tsingátju nina nuju Demas cojo Lucas, me xi doctor xi jercu vinga ná.

¹⁵Tuhun rë ngu nina yëjë ni xuta ladu rë Nina ngajan nandya Laodicea. Hacuaha tuhun rë Ninfa ngu nina cojo yëjë sa me xi matangun me ndava na. ¹⁶Hane xi cjuë chutahaya të rë xujun vi ngajñi nuju ne, nihñu xi hacuaha catichutahaya të rë ngajñi rë xuta ladu rë Nina ngajan nandya Laodicea. Hacuaha xujun xi catsingátju tsëhë xuta Laodicea ne, hacuaha chutahayun të ngajñi nuju. ¹⁷Hane tinújun cojo Arquiipo cju vihi: “Catjiniya tacún xi nihñuchuhun xa xi casatëxa nuju, xi tjin tangun cjuatacun nuju cojo Nai naja.” nina vi.

¹⁸Ngahan, Pablo ne, titsihindu nuju cojo hntsa ngahan ngu nina vi. Ninguitsjun ná nguehe ndavaya. Nina ne, catisua nuju me cjuandaja.